


La Risola ve envia a cognoscer col teater

I projec del Pian di Joegn de zona va inant de pien. Chisc dis se à avert la iscrizions a "La conoscenza del teatro... nel teatro della conoscenza" con la scola "Estroteatro"



Ivano Winterle, gran pascionà de teater, l'è l referent del projet de cognoscenza e espressività del Pian di Joegn de Fascia La Risola.

Sozieta - L'è stat dassen n gran suzess e n grum de adejions per i prumes projec del Pian di Joegn de Fascia "La Risola" 2010. L desch de coordinament, che à desche referent politich l'assessora a la politiches sozièles del Comprenjorie Ladin Alessandra Cloch e desche referent tecnich la d.ra Susanna Chiocchetti, à vardà fora e portà a l'aproazion dant tel C11 e dapò a Trent n muie de bie projec, per gran pèrt nasciui diretamente dai joegn.

L projet per cognoscer l schi alpinism, che pearà via ai 21 de mèrz, à jà serà sù la iscrizions dant del temp pervedù, ajache l'è stat jà arjont l numer di posc desponìboi.

Ades l'è ora de se scriver ite a n auter bel projet, che é stat prejentà da Ivano Winterle con la scola de teater "Estroteatro". Chest projet, dal tìtol "La cognoscenza del teater... tel teater de la cognoscenza" perveit 20 scontrèdes de na ora e mesa l'una che vegnarà metudes a jir te doi tempes: la pruma pèrt dal scomenz de oril al scomenz de jugn

e la seconda da la metà de setember a la fin de november, de mèrtesc sera, da les 18.30 per i più joegn (dai 11 egn) e da les 20.15 per i più gregn.

A la fin de dut l percors vegnarà portà sun paladina l spetàcol de teater.

La fases del percors perveit dant de dut l "se cognoscer" travers la esprescions del corp, la doura de la ousc e la improvisazion, acioche ogneun posse doventèr patron de la competenzes de basa del teater e ciapèr coscienza de la potenzialitèdes de so corp, de so mus, de sia ousc. La seconda fasa, chela del "cognoscer" vel envièr i partezipanc a se documentèr su l'identità ladina e a envièr via na reflescion sun so sens de partegnuda. La terza fasa l'è chela del "se confrontèr e tor posizion sun sia cognoscenza", olache i partezipanc, travers l lengaz del teater, i vegn envié a se confrontèr e a produjer materièl che ciaparà forma mìngol a l'outa per doventèr n vero spetàcol de teater. En última

sarà la fasa del "fèr cognoscer" apontin con la prejentazion su la scena del frut de dut l lurier, n spetàcol avert al publiche che sarà deldut o en pèrt per ladin. L cost de dut l percors l'è de 50,00 euro. Per n saer de più sul projet e sui chisc corsc, che é averc ai joegn dai 11 ai 29 egn ma fosc i pel ence aer vèlch deroga per i "over 30", se pel domanèr a Ivano Winterle al 335.5260314 o manèr na mail a ivanowinterle@ivycasa.com. Na serèda de prejentazion del projet vegnarà endrezèda en mèrtesc ai 30 de mèrz da les 8 da sera te oratorie de Poza. Chel l'è ence l'ùltim dì bon per se scriver ite al projet, ma l'è miec no spetèr a l'ùltim moment, per no risièr de no ciapèr più post. Per se scriver ite o aer informazions più avisa ence sui etres projec de La Risola se pel ence se oujer al portel informatif che é avert aló dal Comprenjorie vigni sabeda domesdì da les 4 enschin les 6 o manèr na mail a pianogiovani.fassa@alice.it o amò jir tel grop La Risola sun Facebook.